



Saopćenje za javnost

Br. dok. 489/16

PETA SARAJEVO UN SEDMICA MEĐUVJERSKOG SKLADA U SVIJETU
Sarajevo, 8.-10. februar/veljača 2017. godine

Javna rasprava
Izazovi bosanske društvene pluralnosti
8. februar/veljača (srijeda) 2017. godine
početak u 19:00 sati
Hotel Europe

Centar za međureligijski dijalog Međunarodnog foruma Bosna organizirat će 8. februara/veljače (srijeda) 2017. godine s početkom u 19:00 sati, javnu raspravu *Izazovi bosanske društvene pluralnosti*.

Uvodni govornici ove javne rasprave su:

Mehmedalija Hadžić, David Kamhi, Rusmir Mahmutćehajić, fra Ivo Marković, Žarko Papić i Yuri Stojanov.

Sudionicima javne rasprave obratit će se gđa. Sezin Sinanoglu, rezidentna koordinatorica UN-a u Bosni i Hercegovini.

Ova javna rasprava je dio programa *Peta Sarajevo UN sedmica međuvjerskog sklada u svijetu*.

Pluralnost bosanskog društva, kao i svakog drugog u svijetu, uključuje teško izbrojivo mnoštvo sadržaja – naraštajskih, religijskih, ekonomskih, političkih, ideoloških i tako dalje. Kada je društvena pluralnost usmjerena prema poželjnoj budućnosti, čemu služe politički, kulturni i ekonomski poreci, ti različiti sadržaji mogu doprinosti osvješćenju odgovornosti i odnosa prema pojedincu, zajednicama i svijetu. Ali, mogu biti i okrutno zloupotrebljavani protiv čovjeka i svijeta. Bosanska društvena pluralnost se u dugome razdoblju, i pored svoje raskošnosti, uglavnom pokazuje kao agonija

uzrokovana nedostatkom jasne vizije budućnosti kojoj bi ta pluralnost mogla doprinosti. Umjesto njenog šticeanja i njegovanja kao dobra najvišeg reda, ideologijski su konstruirane i podržavane suprotstavljenosti i isključivanja sadržaja te pluralnosti.

U ovoj javnoj raspravi bit će preispitivani različiti vidici političke, kulturne i ekonomske pluralnosti bosanskog društva s obzirom na sadašnja, prošla i buduća stanja. Okviri tih preispitivanja su opće prilike svijeta. Odabrani govornici promatrat će ta pitanja u različitim vidicima.

Mehmedalija Hadžić je muslimanski teolog, diplomata i prevoditelj s arapskog jezika. Smatran je jednim od najmjerodavnijih bosanskih znalaca muslimanske sakralne tradicije.

David Kamhi je violinista, redovni profesor muzičke akademije Univerziteta u Sarajevu i istraživač bosanskog sefardskog naslijeđa.

Rusmir Mahmutćehajić je filozof, političar i pisac. U njegovom opsežnom djelu na više jezika su i knjige: *Andrićevstvo: Protiv etike sjećanja*; *Hval i Djeva 1-3*; *Iz Jerusalema: O jednosti, vjesništvu i povratku* i *Bosanski odgovor: O tradiciji i modernosti*.

Fra Ivo Marković je franjevački redovnik, svećenik i pisac. Široj bosanskoj javnosti poznat je po svom zagovoru interreligijskog dijaloga i harmoniziranja odnosa među činiteljima bosanske pluralnosti. Osnivač i voditelj je Zbora Pontanima, proslavljenog u zemlji i svijetu, uvjerljivog simbola harmonizacije društvene pluralnosti.

Žarko Papić je političar, diplomata i istraživač različitih društvenih sadržaja politike, kulture i ekonomije u zemlji i svijetu. Njegovo pisano djelo obuhvata brojne sadržaje jugoslavenske i postjugoslavenske političke, kulturne i ekonomske drame. Njegove analize i prikazi bosanske društvene zbilje nezaobilazna su osnova svakog odnosa prema politici, kulturi i ekonomiji ove zemlje.

Juri Stojanov je istraživač i pisac. Njegovo akademsko područje obuhvata prije svega historiju religije u najširem značenju tog pojma, a naročitu teologiju kraja vremena u istočnom hrišćanstvu, hereziologiju bogumilstva, te pitanja o srednjovjekovnoj bosanskoj crkvi i odnosu religijskog dualizma i abrahamovskih tradicija.

Ova javna rasprava, koju će moderirati Mehmedalija Hadžić, otvorena je za članove i prijatelje Međunarodnog foruma Bosna i predstavnike medija.

Ovaj program podržava, kao i ranije Općina Stari Grad Sarajevo.

Asim Zubčević

MFB Centar za međureligijski dijalog

061 913 582